

**Najib: Kalau hendak jatuhkan saya, bertanding dalam pemilihan Umno  
Free Malaysia Today  
Ogos 27, 2016**

**Najib turut menyifatkan seorang bekas pemimpin negara yang berkhidmat selama 22 tahun sebagai kaki gaduh.**

CAMERON HIGHLANDS: Perdana Menteri, Datuk Seri Najib Razak mencabar pengkritiknya yang tidak berpuas hati dengan kepimpinan beliau supaya bertanding dalam pemilihan Umno akan datang.

“Kalau hendak jatuhkan saya, bertandinglah dalam Umno, tetapi jangan runtuhkan Umno,” katanya ambil disahut tepukan gemuruh ketika berucap merasmikan persidangan perwakilan Umno Bahagian Cameron Highlands, hari ini.

Kenyataan itu secara tidak langsung merujuk kepada pengkritik terhebatnya yang juga bekas Perdana Menteri, Tun Dr Mahathir Mohamad yang cuba menjatuhkan Najib melalui kempen Selamatkan Malaysia.

Najib yang dipetik Bernama juga secara sinis berkata, jika beliau berhasrat menjadi perdana menteri dan presiden Umno selama 22 tahun lagi, perlembagaan parti sebelum ini boleh diguna pakai.

“Kalau mengikut perlembagaan dahulu, siapa nak bertanding presiden dia mesti mendapat sokongan daripada 56 bahagian Umno, ingat senang nak dapat, satu pun susah.

“Tetapi, bila saya jadi presiden Umno dan perdana menteri, saya ambil langkah pindah perlembagaan dan serahkan nasib saya kepada 160,000 perwakilan yang layak memilih,” katanya.

Sementara itu, Najib menyifatkan seorang bekas pemimpin negara yang berkhidmat selama 22 tahun sebagai kaki gaduh.

Presiden Umno itu berkata, pemimpin tersebut sering mengkritik pemimpin terdahulu dan sekarang sebagai tidak betul dalam segala tindak-tanduk mereka.

Walaupun tidak menyebut nama pemimpin itu, namun semua tahu yang Dr Mahathir pernah berkhidmat sebagai perdana menteri selama 22 tahun.

“Ada pihak yang mengatakan Malaysia negara gagal, apatah lagi ini disebut oleh bekas pemimpin yang kita sanjung selama ini, saya dan Menteri Besar (Pahang), Datuk Seri Adnan Yaakob antara penyokong setia (pemimpin itu) selama 22 tahun.

“Kita pertahankan dia, tapi hari ini dia tergamak duduk sama dengan pembangkang. Kita semua faham orang yang kaki gaduh ini akan selalu cari gaduh.

“Pertama dengan (perdana menteri pertama) Tunku Abdul Rahman (dikatanya) tak betul, (perdana menteri ketiga) Tun Hussein Onn tak betul, (bekas timbalan perdana menteri) Tun Musa Hitam tak betul, (perdana menteri kelima) Tun Abdullah Ahmad Badawi tak betul dan terbaru Sultan Johor, Sultan Ibrahim Sultan Iskandar juga tidak betul,” katanya.

**Copyright (C) 2009-2016 MToday News Sdn. Bhd. All Rights Reserved.**

Source: <http://www.freemalaysiatoday.com/category/bahasa/2016/08/27/najib-cabar-ahli-tidak-puas-hati-bertanding-dalam-pemilihan-umno/>